

Zvijezda i polumjesec protjeruju crkvu i krst

21/04/2010 09:45 by Administrator

Vijeće naroda RS i klubovi u sastavu ovog organa nemaju nadležnost da se upliću u rad lokalnih zajednica, pa najava inicijative kojom će Klub Bošnjaka zatražiti ocjenu ustavnosti obilježja Banje Luke, Vlasenice i Nevesinja jeste nepoznavanje elementarnih činjenica u vezi s nadležnostima između općina i entiteta, rekao je za "Fokus" Staša Kožarac, šef Kluba Srba u Vijeću naroda RS, reagujući na najavu Kluba Bošnjaka u Vijeću naroda RS da će u narednom periodu uputiti inicijativu Ustavnom sudu RS za ocjenu ustavnosti obilježja grada Banja Luka, te općina Vlasenica i Nevesinje. Klub smatra da grbovi ovih lokalnih zajednica nisu u skladu sa Ustavom RS i ne odražavaju kriterijum proporcionalnosti i zastupljenosti konstitutivnih naroda - rekao je Edin Ramić, šef ovog kluba, kao primjer navodeći grb Banje Luke, u kojem su temelji crkve, i ističe da Bošnjaci nemaju ništa protiv crkve, ali da to ne odražava zastupljenost i ostalih konstitutivnih naroda.

Kožarac je reagujući na ove navode rekao da pitanje grba jeste isključiva nadležnost jedinica lokalne samouprave, odnosno općina i gradova. - Nema nikakve potrebe da Klub Bošnjaka ulazi u nešto što nije njihova nadležnost. Ne treba podgrijavati odnose u predizbornoj kampanji naročito ukoliko se zna da u mnogim gradovima u Federaciji BiH postoje problemi, jer se u obilježjima ne mogu prepoznati predstavnici srpskog naroda. Radi se o pripremama za predizbornu kampanju. Nadležnosti svakog od nacionalnih klubova u Vijeću naroda RS jesu razmatranje akata koje usvaja Narodna skupština RS, a nikako akata koje usvajaju općine i gradova - zaključio je Kožarac. Ognjen Tadić, potpredsjednik SDS, rekao je da se radi o želji za podizanjem izbornog rejtinga SDA, rekavši da se radi o neprincipijelnom zahtjevu, jer se u FBiH na brojnim obilježjima nalaze lili ili polumjesec i zvijezda. - Odlukama odbornika SDA u općinama u FBiH polumjesec je dobio dominantan status. Neka prvo promijene to u FBiH, tamo gdje imaju većinu, pa neka izađu u javnost sa stavovima o obilježjima općina i gradova u RS - rekao je Tadić. Branislav Borenović, potpredsjednik PDP i poslanik u parlament RS, kaže da se radi o pokušaju radikalizacije političke scene unutar BiH. - Pokazatelj je to koliko Klub Bošnjaka nema želju da doprinese poboljšanju političkih odnosa. Očito je da se bliže izbori. Kada se ta priča otvara na hiljade razloga više jeste u FBiH, gdje se direktno ide na štetu srpskog naroda po brojnim pitanjima - rekao je Borenović. Milenko Ajkić, portparol Administrativne službe Grada Banja Luka, rekao je da nisu obaviješteni o inicijativi Kluba Bošnjaka zbog čega u ovom trenutku nemaju komentar. Od juna 2007. godine zvanični znak Srpske jeste amblem Republike Srpske, koji je zamijenio dotadašnji grb Republike Srpske, koji je Ustavni sud BiH proglasio neustavnim. Amblem će ostati u zvaničnoj upotrebi sve dok zvanično ne bude usvojen novi grb Republike Srpske. Narodna skupština RS u julu 2008. godine usvojila je novi grb RS, ali ga je u decembru 2008. godine neustavnim proglasio Ustavni sud Republike Srpske.

Grb Banje Luke Grb Banje Luke predstavlja plavo polje, u obliku štita, oivičeno zlatnom trakom, s vizurom Banskog dvora u gornjem dijelu, te listom kestena kao simbolom aleja, Kastelom, a u dnu štita stilizovanom linijom rijeke Vrbas. Središnji dio grba simbolizuje temelje saborne crkve, u bijeloj boji, a u sredini temelja je krst, sa oclima, u crvenoj boji.

Grb općine Vlasenica Grb općine Vlasenica na središnjem dijelu ima crkvu dok se na središnjoj pozadini nalazi zastava Republike Srpske. U donjem dijelu grba jeste krst bijele boje na crvenoj pozadini. U lijevom uglu grba nalazi se list, a u desnom uglu drvo bor.

Grb općine Nevesinje Na grbu općine Nevesinje u donjem središnjem dijelu nalazi se krst sa četiri oclima, dok su u gornjem dijelu grba ukrštene dvije puške. Na grbu dominira svijetloplava boja a krst sa oclima je bijele boje na crvenoj podlozi.